

DEKLARASAUN MOVIMENTU BA JUSTISA KLIMATIKA

“Oras ida ba mundu”

Mundu ohin loron globalmente hasoru ona impaktu mudansa klimatika ne'ebe boot. Mundu ne'e dadaun iha risiko boot ba umanidade, disaster ekologiku, hanesan hamlaha, nasaun ilha balun hahu lakon/ mout no nia mundu nia ezistensia rasik. Risiko ida ne'e mai husi interese ema, kompania no nasaun riku sira ne'ebe fo importansia deit ba sira nia lukru ekonomia rai-laran duke vida populasaun mundu ne'e nian.

Sientifiku barak mak deklarasaun ona sira nia peskiza kona-ba mundu ida ne'e no nia emar sira nia vida. Kondisaun sira ne'ebe hadalan ba estraga mundu ne'e sei la bele muda, bainhira ema, kompania no nasaun industrializadu sira sei kontinua aumenta sira nia emisaun ba atmosferu mundu.

Mundu ne'e sei bele aguenta ba tinan barak tan no garantia katak ema hotu-hotu sei iha oportunitade atu moris no hamoris sira nia jersaun, karik ema-hotu hotu konsiente katak redusaun ba emisaun gas estufa nian tenke minimiza, stilu moris ema nian tenke hetan mudansa.

Timor-Leste agora dadaun mos sai ona nasaun produtor mina-rai iha mundu no mos sae ona nudar nasaun ne'ebe suporta ba emisaun iha mundu. Dezenvolvimentu rai laran nian mos hadalan ita ba estragus ambiental no polusaun.

Realidade ohin loron iha Timor-Leste mos hatudu hela ba ita katak risiko ba hamlaha, risiko hasoru umanidade no ezistensia umanu nian hakbesik mai ita dadaun. Tempu udan la tuir nia tempu, bai-loron naruk, dezastre naturais akontese bei-beik, produsaun agrikultura menus no hetan estagus, bee matan barak mak hahu maran, tasi ninin barak mak naksobuk (abrasi zona kosteira) no seluk tan.

Fenomena sira ne'e tenke hetan atensaun husi ema hotu-hotu, ita hotu tenke konsiente katak “Mundu ida ba ita hotu” mai ita hotu hodi salva ezistensia mundu ida ne'e ba ita nia oan no jersaun futuru sira.

Tamba ne'e, ami husi Movimentu ba Justisa Klimatika iha Timor-Leste husu no ezizi ba:

- Nasaun industrializadu sira atu hamenus sira nia emisaun gas estufa nian to 40-45% iha 2020 no 80-85% iha 2050 bazeia ba relatoriu IPCC (Intergovernmental Panel on Climate Change)
- Nasaun Industrializadu liu-liu Estadu Unidus, Uniaun Europa, Australia, Xina, Japaun no sira seluk atu konsiente ba populasaun mundu ne'e nian tomak, hodi fo antensaun ba normalizasaun gas estufa nian hodi mantein iha 350ppm.

- Nasaun Industrializadu sira hodi fo reparasaun no kompensasaun ida ne'ebe igual ba estragus ambiental ne'ebe sira halo durante ne'e.
- Nasaun industrializadu sira atu mobiliza no inisia utilizaun enerzia renovavel ne'ebe familiar ho ambiente inklui mudansa ba sistema moris ne'ebe durante ne'e eziste no estraga ambiente.
- ONU ne'ebe durante ne'e fasilita konvensaun ba mudansa klimatika nian atu pro ativu hodi fo presaan no resolusaun ida hodi hatan ba situasaun emerjensia mundu nian. No mos resolusaun atu hapara no hakotu imediatamente teknolozia no pratika dezenvolvimentu nian ne'ebe estraga ambiental.
- ONU, liu-liu iha konseilho Seguranca atu hasai resolusaun kontra nasaun ne'ebe halo polusaun grave to'o nivel sub-regional ka regional nudar krime sira kontra humanidade.
- Governu Timor-Leste atu konsiente mos ba nia povo rasik, hodi alkansa politika dezenvolvimentu ida ne'ebe sustentavel, renovavel no familiar ba ambiental.
- Governu Timor-Leste ne'ebe asina ona Protokolu Kyoto atu implementa rekomendasaun no klausa sira ne'ebe protokolu ne'e hateten.
- Sosiedade tomak iha mundu ne'e atu konsiente katak hamenus emisaun no mudansa ba stilu moris nian sei halo ita atu salva ita nia mundu ida ne'e.
- Governu Timor-Leste atu hapara osan boot ba projektu oleu pezadu nebe estraga rai no meu ambiente, hodi tau orsamentu diak liu ba dezenvolve no promove energia nebe diak ba meu ambiente hanesan energia husi anin, bee, loromatan, biogas no energia renovavel sira seluk.
-

A Luta Kontinua

Movimentu ba Justisa Klimatika

Haburas Foundation, La'o Hamutuk, Permatil, Hasatil, Hak, MDI, KSI, FSG, FMTL, MEFE-TL, no ativista no individual sira seluk.